



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Veri & Pii Sacerdotis Idea Seu Vita R. D. Iacobi  
Merlo-Horstii, Pastoris B. Mariæ Virginis In Pascvlo  
Coloniæ, SS. Theol. Licent.**

**Crombach, Hermann**

**Coloniæ, 1645**

Caput 6. Sacris Ordinibus, & Sacerdotio ante legitimam aetatem initiatur  
Anno 1621.

**urn:nbn:de:hbz:466:1-14591**

nominis definitione prolata nitatur esse quod dicitur. Si enim Cleros Græcè, Latinè Sors appellatur, propterea vocantur Clerici, vel quia de Sorte sunt Domini, vel quia ipse Dominus sors, id est, pars Clericorum est: qui autem vel ipse pars Domini est, vel Dominum partem habet, talem se exhibere debet, ut & ipse possideat Dominum, & possideatur à Domino: qui ergo Dominum possidet, & cum Propheta dicit: Pars mea Dominus, nihil extra Dominum habere potest: quod si quidquam aliud habuerit præter Dominum, pars eius non erit Dominus, v. g. si aurum, si argentum, si variam suppellectilem, si possessiones, cum istis partibus Dominus pars eius fieri non dignabitur.] His calcaribus se ad vitam Clerico dignam excitabat.

## C A P V T VI.

*Sacris Ordinibus & Sacerdotio ante legitimam  
ætatem initiatur A. 1621.*

**E**Xistimabat R. D. Ioannes Gelenius plurimum Iacobum profuturum proximis, si quam maturrimè Sacerdotio fungeretur: quæ vero causæ præcipuæ per-

permouerint, vt assentiretur, & præuiâ dispensatione citiùs ordinaretur, hæcenus non comperi; tempus ipse consecrationis suæ his consignauit verbis: [Anno 1621. 6. Martij sum ordinatus in Sacerdotem à R<sup>mo</sup> D. Ottone Episcopo Cyrenensi & Suffraganeo: 21. Martij celebravi primum meum Sacrum in Sacello S. Ursulæ, vulgò Camera Aurea:] dedit hoc Patronæ suæ, quam honore præcipuo cum vndecim milibus Virginum venerabatur; dedit & animi demissioni, quippe qui quoad eius fieri posset, splendorem omnem externum & applausum declinabat, magis sollicitus, vt Deum eximiam sibi pietate mentisq; feruore demereretur, quam ab alijs videretur. Exinde ferè quotidie rem diuinam, nisi morbo præpediretur, factitabat; nec etiam cum iter faceret, & impedimenta non leuia moram inferrent, deduci se à piâ consuetudine patiebatur: præmittebat quinos Ecclesiæ Psalmos consuetos, & pias è Thomâ de Kempis & alijs depromptas preces, quas postremis annis è paradiso suo petebat: mirificè verò pietate suâ præfentes ad orandi studium & religionem

ex-

*In S Ursula celebrat primitias.*

*Quotidie Sacrum legit.*

*Preparatio ad id.*

excitabat, quod vberius varijs operibus  
præstitit, præcipuè in Aphorismis, Para-  
diso & industrijs piè celebrandi seorsim  
editis, vt hisce facibus languorem Sacer-  
dotum ætatis nostræ & tepiditatem in-  
flammeret. Vt verò se quotidie Sacerdo-  
talis officij commoneret, Breuiario duas  
has præscripsit sententias, primam S. Gre-  
gorij in Pastoralis: [Nemo in Ecclesia am-  
plius nocet, quàm qui peruersè agens no-  
men vel ordinem sanctitatis vel Sacerdo-  
tis habet: delinquentem namque redar-  
guere nullus præsumit, & in exemplum  
valde culpa extenditur, quando pro re-  
uerentia Ordinis peccator honoratur.]

*S. Gregor.  
in Pastor.*

Adiecit & istam S. Hieronymi in Ezech. *Hiero. in  
Ezech. l. 2.* [Grandis dignitas Sacerdotum, sed  
grandis ruina, si pereant: letamur ad a-  
scensum, sed timeamus ad lapsum: non  
est tanti gaudij excelsa tenuisse, quanti  
mœroris de sublimibus corruisse: nec e-  
nim solùm pro nostris delictis reddemus  
rationem, sed pro omnium quorum ab-  
utimur, & nequaquam sumus de eorum  
salute solliciti.] Adscripsit Hymnum ex  
S. Augustino.

HY.

HVMNVS S. AVGVSTINI  
de dignitate & vita Sacerdotum.

**V**iri venerabiles Sacerdotes Dei,  
Pracones altissimi, lucernae diei,  
Charitatis radio fulgentes & spei,  
Auribus percipite verba oris mei.  
Vos in Sanctuario Dei deseruitis,  
Vos vocavit palmites Christus vera vitis.  
Cauete ne steriles aut inanes sitis,  
Sic cum vero stipite viuere velitis.  
Vos estis Catholicae legis protectores,  
Sal terra, lux hominum, ouium pastores,  
Muri domus Israel, morum correctores,  
Iudices Ecclesiae, Gentium Doctores.  
Si cadat protectio legis, lex labetur,  
Si sal euauerit, in quo salietur?  
Nisi lux appareat, via nescietur,  
Nec si Pastor vigilet, ouile frangetur.  
Vos coepistis vineam Domini procurare,  
Quam doctrinae riuulis debetis rigare,  
Spinas atque tribulos procul extirpare,  
Ut radices fidei possint germinare.  
Vos estis in area boues trituranter,  
Prudenter à palea granum separantes,  
Vos habent pro speculo legem ignorantes  
Laii, qui fragiles sunt & inconstantes.

Quid-

*Quidquid vident Laici vobis displicere,  
 Dicunt procul dubio sibi non licere:  
 Quidquid vos in opere vident adimplere,  
 Credunt esse licitum, & culpâ carere.*

*Cum Pastores ouium sitis constituti,  
 Non estote desides, sicut canes muti:  
 Vobis non deficient latratus acuti,  
 Lupus rapax inuidet ouium saluti.*

Addamus Praxim ipsam celebrandi,  
 quam seruari solitus postea typis seorsim  
 excusam etiam communicaturis accom-  
 modauit.

**P R A X I S B R E V I S S I M A**  
 piè Celebrandi & Communicandi,  
 pro Sacerdotibus & Laicis:

*Tum ante, tum post Missam & Commun.  
 utilis.*

Obserua hîc Actus præcipuarum  
 virtutum.

*Adorationis & Grat. Act.*

**O** Dulcissime Saluator, Christe Iesv,  
 qui ex nimia charitate nos miserè  
 perditos redemisti pretio Sanguinis tui:

Et

Et in huius Amoris tui memoriam, necnon in pignus futuræ gloriæ, tam admirabili Potentia, Sapientia & Bonitate dedisti nobis in cibum & potum ipsum Corpus & Sanguinem tuum: Denique ad hæc diuina Myſteria, me viliffimum peccatorem in numerum tuorum [*Sacerdotum*] Seruorum tua ineffabili clementia vocare dignatus es.

*Adoro te ex toto corde, & gratias tibi ago ex intimis visceribus animæ meæ, pro tam immensis beneficijs tuis; & affectus omnium Electorum tuorum mihi medullitus opto, vt placere tibi possim in hoc opere, quod facturus sum. (vel iam feci.)*

*Contritionis.*

Sed heu me miserum, qui hæctenus tam indignè vocatione mea vixi, & toties, & tam grauitè te DEVM meum offendi peccatis meis (præsertim his N...) Sed nunc de ijs, *Doleo* ex intimo corde meo, ob Amorem tui super omnia: & deinceps Tibi soli seruire, placere, & adhærere propono.

*Puræ Intentionis.*

Proindeq; nunc accedens ad Mensam

Con-

Conuiuij tui, ex omni affectu cordis mei  
Tibi [*hoc Sacrificium, Missæ*] dignissimam  
hostiam Corporis & Sanguinis tui, quam  
tu ipse semel pro nobis in Ara Crucis ob-  
tulisti; offero ad laudem & gloriam æternæ  
Maiestatis tuæ; In memoriam sacratissi-  
mæ Incarnationis, Vitæ, Passionis ac Mor-  
tis tuæ.

In gratiarum actionem pro omnibus  
donis & beneficijs, toti cœtui Electorum,  
& mihi indignissimo peccatori hucusque  
præstitis: vel vnquam præstandis.

Pro salute quoque Fidelium Viro-  
rum N... Et solatio Defunctorum N...

Et vtinam ex omni affectu, feruore &  
desiderio Amicorum tuorum, seu iam re-  
gnantium in cœlis, vel adhuc militantium  
in terris, hoc tam grande tuæ pietatis o-  
pus peragere possem. (*vel potuiss. m.*)

*Fidei.*

Corde siquidem *Credo*, mi IESV, & ore  
confiteor, quia Pater æternus, DEVS sei-  
pso summè beatus, potens, perfectus, &  
nullius egens, secundum infinitam mise-  
ricordiam suam sic dilexit Mundum, vt  
Te Filium suum Vnigenitum nobis daret  
Saluatorem. Cre-



Credo quoque, quod Tu ipse Patri æqualis per omnia, ex vi immensæ charitatis tuæ de sinu Patris descendisti in uterum Virginis, & propter nos homines HOMO FACTVS ES. Et quod ex amore nostri hoc Sacramentum in vltima Cœna instituens, verum Corpus & Sanguinem tuum, id est, Te ipsum nobis ad manducandum dedisti. Et denique Patri tuo factus obediens vsque ad mortem, Temetipsum pro nobis Hostiam in Ara Crucis obtulisti.

*Spei.*

Ideoq̄; *Spero* in te, magna fiducia venio ad te, ô Domine, qui nostri causa tam mira facere; & tam dira pati voluisti. Quid enim negabis, qui sic amasti, vt teipsum dares?

*Amoris.*

*Amo* Te quoque, ô bone IESV, ex tota virtute cordis mei, & semper deinceps, & in æternum amabo, si tu dederis.

*Oblationis & Resignationis sui.*

Sed quid retribuam tibi, Domine, pro tanto munere, & pro omnibus, quæ retribuisti mihi? Ecce, me ipsum totum, Corpus,

pus, Animam, & omnia offero in omne  
beneplacitum benignissimæ vountatis  
tuæ.

*Humilitatis, & Vnionis cum meritis  
Christi.*

Verùm quid habeo, quod non accepe-  
rim? Quid vilis creatura, vermis terræ,  
miser peccator, pauper & seruus inutilis  
præstare poterit DEO, Creatori ac Domi-  
no suo? Tu ipse potiùs, ô Domine, vtpote  
Aduocatus & Mediator meus, diues in  
meritis & miserationibus, suscipe causam  
meam.

Et ex thesauro immense charitatis tuæ  
fer opem inopiæ meæ: & pretium Sangui-  
nis tui, omniumque meritorum tuorum  
repræsenta æterno Patri tuo; & hinc sup-  
ple omnem defectum meum, præcipuè  
huius meæ, heu, nimis modicæ & imper-  
fectæ præparationis, qua ad hæc SS. my-  
steria venio, vt sic Ei per Te placeat obse-  
quium indignissimæ seruitutis meæ.

*Postulationis.*

Fac etiam, ô Bone IESV, per omnes mi-  
serationes tuas, vt hoc tremendum My-  
sterium & admirabile donum charitatis  
tuæ, debitâ semper Fide, Reuerentiâ &

B

Gra-

Gratitudine prosequar: idq; puro & ardenti corde nunc & semper recipiam. Statum hunc quoque meum N. ad quem me ex singulari gratia vocare dignatus es, Charitate, Castitate, Humilitate, Mansuetudine, Patientia, Sobrietate, &c. Moribusq; tibi placitis, & [ *sacerdote* ] fidei seruo tuo dignis excolere studeam. Idq; ut seruitus mea magis tibi placeat: Ad maiorem gloriam tuam, Ecclesiæ utilitatem, & propriam proximiq; salutem.

*Abnegationis sui & Vnionis cum Deo.*

Vnde tandem supplex rogo, vt per virtutem Corporis & Sanguinis tui, abstrahas cor meum efficaciter ab omnibus noxijs affectibus N... qui gustum ac fructum huius Sacramenti impediunt, & intimè tibi vnias & incorpores, vt gustem quàm suauis sis, Domine, & vnus tecum efficiar spiritus: vt tu in me, & ego in te maneam, adeoq; nihil sit, quod me vnquam separare valeat à te. Nam tibi adherere mihi bonum est, &c. Quid enim mihi est in cælo, & à te quid volui super terram? ô pars mea Deus in æternum!

CA-